



mjesečni Bilten

omladinska mreža bosne i hercegovine

maj
svibanj
2016.

204

Dragi prijatelji/ce,

Predstavljamo vam majsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net

SADRŽAJ

Aktivnosti u maju 2016.....	2
Planovi za juni 2016.....	7
Aktivnosti članova mreže.....	8
Saopštenja/informacije/donatori/pozivi	26



Uživajte u čitanju!

AKTIVNOSTI ORC/HCA U MAJU 2016.

Prekogranična građanska mreža za mir, pomirenje i sigurnost ljudi na Balkanu



Claim!

CITIZEN'S NETWORK FOR PEACE, RECONCILIATION AND HUMAN SECURITY

Projekat „**Prekogranične građanske mreže za mir, pomirenje i sigurnost ljudi na Balkanu**“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

U okviru ovoga u Sofiji, Bugarska je - od 11. do 13. maja - održan Forum nevladinih organizacija „**Procjena novih rizika, proširenje mreže HS**“. Domaćin Foruma bio je Institut za regionalne i međunarodne studije (IRIS) – partner iz Bugarske. Forum je okupio predstavnike organizacija civilnog društva, istraživačkih instituta, kao i javnih institucija iz: *Bosne i Hercegovine, Bugarske, Francuske, Grčke, Kosova, Makedonije, Crne Gore, Srbije i Turske*. Forum je također podržan i od strane *Instituta Otvoreno društvo iz Sofije*.



Sesije održane tokom foruma bavile su se specifičnim izazovima ljudske sigurnosti u zemljama i regionu, u kojima su partneri iz mreže i drugi eksperti vršili istraživanja o: nasilju među mladima, radikalizaciji, raseljavanju, prisilnom glasanju, krizi povjerenja u javni sektor i problemima izbjeglica.

Događaj u Sofiji imao je još jedan važan zadatak: Usvojena je zajednička deklaracija o saradnji na pitanjima Ljudske sigurnosti na Balkanu i Turskoj od strane prisutnih organizacija i pojedinaca. Ovim se otvorio put za proširenje CN4HS mreže u regionu, čime bi se agenda Ljudske sigurnosti učinila vidljivijom za donosiocje odluka i institucije na nacionalnom i EU nivou, a koja bi mogla odgovoriti na postojeće izazove ljudske sigurnosti u regionu.

Tokom Foruma u Sofiji partnerima u mreži pridružili su se novi saradnici (organizacije i pojedinci) iz *Bugarske, Makedonije, Crne Gore, Srbije, Kosova i Turske*. Proširena CN4HS mreža će nastojati da se sastaje bar jednom godišnje na Balkanu, Turskoj ili Briselu.

Ovaj događaj je također poslužio partnerima kao prilika da procijene više od 70 aplikacija za male grantove u vezi Ljudske sigurnosti. Grantovi se dodjeljuju organizacijama i pojedincima sa Balkana.

Učesnici iz BiH na Forumu bili su: *Vehid Šehić – Forum građana Tuzle, Aleksandar Žolja – hCa Banja Luka, Jasmin Jašarević – PRONI Brčko i Miralem Tursinović – ORC Tuzla*

Partnerski projekat – „Divided past – joint future“



DIVIDED PAST JOINT FUTURE

Omladinski resursni centar Tuzla sprovodi istraživanje percepcije i ponašanja različitih aktera u procesu izgradnje mira i pomirenja na Zapadnom Balkanu kao dio IPA projekta „Podijeljena prošlost-zajednička budućnost“. Svrha ovog projekta je izgradnja infrastrukture za efektivan proces pomirenja na Zapadnom Balkanu i Turskoj. Istraživački dio projekta zahtijeva sudjelovanje predstavnika privatnog sektora, sektora civilnog društva, javnog sektora i građana u nizu fokus grupa u kojima mogu ponuditi svoja stajališta, iskustva i mišljenja o procesu pomirenja u (Bosni i Hercegovini) kao i u regiji.

U okviru ovoga smo tokom maja organizovali fokus grupe, kako bi razgovarali o različitim problemima koji se odnose na proces pomirenja – od samog značenja pomirenja za društvo, potom ocjene uloge različitih društvenih sektora u tom procesu, do načina na koje proces pomirenja može biti osnažen. Fokus grupe su organizovane u Brčko Distriktu BiH i Sarajevu. Tokom sljedećeg mjeseca očekujemo završetak rada na fokus grupama, te izradu transkripta, koji će poslužiti za finalno istraživanje.



Više informacija o aktivnostima u narednom periodu na našoj web stranici: www.omladina-bih.net, te u biltenima i na mejling listama.

Omladinska grupa ORC Tuzla

TURNIR U FUDBALU NA PIJESKU „FUDBAL PROTIV HOMOFODBIJE“

Na predivnom kompleksu Panonskih jezera 29.5.2016. realizovan je turnir u fudbalu na pijesku pod nazivom „Fudbal bez predrasuda“. Organizatori turnira na kojem je učestvovalo 16 ekipa bili su JKP Panonnica i Omladinski resursni centar Tuzla.

Turnir je igran u interesantnom formatu, gdje je svaka ekipa morala imati najmanje 1 muškog ili ženskog člana od ukupno 3 člana. Na ovaj način su organizatori zajedno sa učesnicima željeli poslati



poruku da fudbal kao igra ne poznaje predrasude i da ga igraju baš svi, bez obzira na spol, rasu, vjeru, seksualnu orijentaciju ili naciju.

Od ukupno 16 ekipa, titulu najbolje ekipe na turniru odnijeli su igrači iz tima „*Taumatu*“ (*Amir Karamović*, *Leonardo Lukić* i *Arnela Kitić*) koji su u finalu nakon interesantne borbe u regularnom vremenu pobijedili nakon izvođenja penala ekipu „*Vlasenica 92*“ (*Aldin Džambić*, *Alen Zlatić* i *Envera Hasić*).

JKP Panonnica je za najbolju ekipu obezbijedila besplatan sedmični ulaz na kompleksu Panonskih jezera, a nagrade za najbolju igračicu (*Arnela Kitić*), najboljeg igrača (*Aldin Džambić*), Fair Play (*Envera Hasić*) i najboljeg strijelca (*Ismar Avdić*) Omladinski resursni centar Tuzla.



Turnir je podržan od strane međunarodne organizacije „**Fudbal protiv homofobije**“, čiji rad prate veliki svjetski klubovi poput: Manchester City-a, Wigan-a i drugih.

U toku juna se nastavlja saradnja ORC Tuzla i JKP Panonnica koja traje već 3 godine kroz organizaciju turnira u odbojci na pijesku!

TIM BILDING AKTIVNOST: JAVORJE 2016.

Koordinatori Omladinske grupe su na inicijativu starih i novih članova odlučili napraviti izlet i ujedno teambuilding aktivnost na Javorju (planina Konjuh). Dana 14. maja članovi su se uputili iz Tuzle autobusom za Stupare, odakle su se pješice kroz predivnu prirodu popeli do Planinarskog doma „*Javorje*“ koji se nalazi na 1002 metra nadmorske visine.



Uz igru, druženje i roštilj u naši mladi su na najbolji način iskoristili vikend u prirodi. Vodič grupe u pohodu kroz šume na Konjuhu bio je *Husein Šljivić*, jedan od naših najmlađih članova!

Nakon dana ispunjenog igrom, druženjem i razmjenom ideja za nove aktivnosti za mlade u našem gradu, članovi su krenuli prema Tuzli puni predivnih utisaka.

“EUROACTIVE 2016“

U periodu od 21. do 28.05. 2016. održana je druga aktivnost projekta „EuroACTIVE“ u multietničkom gradu Kikinda. Tema ovog treninga bio je Forum teatar kao sredstvo za rad sa mladima kao podrška i osnaživanje mladih na lokalnom, regionalnom, nacionalnom i internacionalnom nivou.



Učesnici su imali zadatak odrediti probleme sa kojima se susreću mladi iz Kikinde, te kroz Forum teatar građanima ukazati na probleme i moguća rješenja. Kroz razne radionice mladi su se upoznali sa pojmovima građanstva, aktivizma i forum teatra. Pored toga, učesnici su imali priliku posjetiti i Pokrajinsku vladu u Novom Sadu, te razgovarati sa zvaničnim predstavnicima te institucije.

Ovaj projekat okupio je oko 30 aktivista i mladih iz: **Bosne i Hercegovine, Makedonije, Italije, Grčke, Portugala, Hrvatske, Bugarske, Albanije, Srbije i Portugala.** Predstavnici Omladinske grupe ORC Tuzla bili su *Jasmina Begović* i *Suad Murselović*.

PREDSTAVLJAMO MLADE!

MIRNA ANĐELIĆ



Mirna Anđelić je studentica Tehnološkog fakulteta u Tuzli, odsjek agronomija. Za nju se može reći i da je mlada poduzetnica, ima 20 godina i rođena je i živi u Tuzli. Gaji veliku ljubav prema društvu u kojem se nalazi i sebe smatra odgovornom osobom i dobrim liderom. Član je Omladinske grupe Omladinskog resursnog centra od 2015. godine.

MEDIHA DELIĆ



Mediha Delić ima 20 godina, rođena je u Tuzli, a živi u Srebreniku. Ova mlada i perspektivna djevojka od srednjoškolskih dana je aktivna i svakim danom se trudi i radi na tome da doprinese društvu u kojem živi. Volonter je u mnogim nevladinim organizacijama. Trenutno je student druge godine Ekonomskog fakulteta u Tuzli, i sve svoje obaveze uspijeva da uskladi uz veliko zalaganje, rad i trud. Kao relativno novo lice u našoj grupi prošla je nekoliko seminara. Iskustvo koje je stekla u svom volonterskom radu uspješno iskorištava u radu sa Omladinskom grupom Omladinskog resursnog centra Tuzla.



PLANIRANE AKTIVNOSTI OMLADINSKE GRUPE U JUNU

Fondacija CPI i Omladinski resursni centar će 7. juna od 18h u Narodnom pozorištu Tuzla kroz manifestaciju „Građanska matura“ ugostiti ekipu „Komedijska s nogu“ (Peđa Bajović, Filip Andronik i Hazim Mujčinović), koji će na interesantan način razgovarati sa mladima o njihovoj poziciji u društvu, prilikama koje imaju i problemu odliva mozga.



Skupove simboličnog naziva „Građanska matura“, Fondacija CPI realizovaće u 6 gradova u Bosni i Hercegovini (Mostar, Banja Luka, Sarajevo, Zenica, Doboj i Tuzla) sa lokalnim organizacijama civilnog društva. Skup u u Tuzli će se održati 07.06.2016. u saradnji sa Omladinskim resursnim centrom (ORC) Tuzla, kao lokalnim partnerom.

Dvosatno okupljanje biće ispunjeno muzikom, razgovorom o političkoj situaciji, značaju otvorenosti budžetskog procesa, o tome šta im pruža i kako se koristi Baza javnih finansija uz nastup standup komičara.

REDOVNE AKTIVNOSTI ORC I HCA TUZLA:

Tokom maja radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

PLANOVI HCA/ORC-A ZA JUNI 2016.

- Sprovođenje redovnih aktivnosti kroz Omladinsku mrežu BiH;
- Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu (izdavanje publikacije – policy brief);
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Nastavak organizovanja fokus grupa, u okviru istraživanja u zajedničkom projektu: „Divided past – joint future“;
- Nastavak rada na namicanju sredstava za 2016. godinu.

AKTIVNOSTI ČLANICA OMLADINSKE MREŽE BiH



BOŠNJAČKI INSTITUT – Fondacija Adila Zulfikarpašića

Ul. Mula Mustafe Bašeskije 21, 71 000 Sarajevo

Tel.: +387 33 279 805; Fax: +387 33 279 763

E-mail: narcisap@bosnjackiinstitut.ba

Web: www.bosnjackiinstitut.ba

Idemo u muzej!

Bošnjački institut – Fondacija Adila Zulfikarpašića pokrenuo je projekat pod nazivom **Idemo u muzej!**, a koji je prihvatila, te finansijski podržava Općina Stari grad Sarajevo u okviru Javnog poziva organizacijama civilnog društva. Projekat je pokrenut u cilju da se mladi, učenici i učenice srednjih škola Općine Stari grad na kreativan način povežu i detaljnije upoznaju sa muzejima i galerijama, te njihovim aktivnostima i eksponatima, kojima ove institucije promoviraju bosanskohercegovačko naslijeđe, a koje i same baštine već nekoliko desetljeća.

Dosadašnje iskustvo pokazalo je da učenici i učenice veoma rijetko posjećuju muzeje. Obično su to školski programi sa profesorima/icama kada se većina učenika i učenica prvi put upoznaje sa pojedinim muzejima i galerijama, a veoma su rijetke prilike da dolaze sa svojim roditeljima, te još rijede, skoro, pa da i nema takvih slučajeva, kada učenici i učenice samostalno i samoinicijativno odlaze u muzeje i galerije.



U okviru projekta **Idemo u muzej!** planirano je da se mladi povežu sa muzejima i galerijama, a kako bi i sami na taj način izgradili svoj odnos prema kulturi i kulturnim institucijama, te stekli naviku da provode svoje slobodno vrijeme na kvalitetniji način. Trenutno, u našem okruženju postoji više kladionica i kafića nego sportskih dvorana, biblioteka, muzeja i galerija zajedno, što kulturu marginalizira i karakteriše kao najmanje bitan faktor u odnosu na opću komercijalizaciju društva i veliku nezaposlenost. **Idemo u muzej!** je jedan od načina da se mladima omogući prostor, kako bi izrazili svoju kreativnost i dobili motivaciju kako da kvalitetno iskoriste potencijale svoje lokalne zajednice.

U okviru projekta planirano je organiziranje sedam edukativno- kreativnih radionica za učenike i učenice, u periodu od maja do decembra 2016. godine, koje bi se sastojale od studijske i edukativne posjete muzejima i galerijama, te kreativnog grupnog rada sa voditeljem/icom radionice i strip crtačem/icom. Svaka posjeta i radionica bit će popraćena jednom strip pričom, a tokom obilazaka muzeja i galerija planirano je kreiranje kulturne, edukativne i turističke rute Općine Stari grad Sarajevo.

Teme radionica i posjeta posvećene su različitim aspektima kulturno-historijskog naslijeđa: Arheološka otkrića – Bijela tabija; Sevdah: naslijeđe i muzički pravac - Kuća Sevdaha; Historija i naslijeđe Sarajeva i Bosne i Hercegovine - Muzej Sarajeva, Brusa bezistan; Savremena umjetnost Bosne i Hercegovine - Umjetnička galerija Bosne i Hercegovine; Kultura življenja i stambena arhitektura - Muzej Sarajeva, Svrzina kuća; Život i običaji Jevreja u Sarajevu u Muzeju Sarajevu - Muzej Jevreja; te Zaštita i očuvanje kulturno-historijskog naslijeđa - Bošnjački institut.

Na kraju projekta planirana je izložba eksponata iz muzeja, koje će učenici/ice odabrati tokom posjeta muzejima, te izložba strip priča, kulturne rute i učeničkih komentara i radova.

Idemo u muzej! uključit će oko 100 učenika i učenica srednjih škola sa području Općine Stari grad Sarajevo, Gazi Husrev-begovove medrese, Prve bošnjačke gimnazije, Srednje muzičke škole, Srednje škole za tekstil, kožu i dizajn, Srednje škole poljoprivrede, prehrane, veterine i uslužnih djelatnosti i Srednje ugostiteljsko-turističke škole.

Ovo je drugi projekat, koji Bošnjački institut implementira na poziv Općine Stari grad. Prvi projekat **Mladi naslijeđu**, naslijeđe mladima implementiran je prošle godine i uključio je preko **170 učenika** i učenica srednjih škola Općine Stari grad. Tokom projekta mladi su imali priliku da se upoznaju sa kulturno-historijskim naslijeđem svoje lokalne zajednice kroz osam edukativno-kreativnih radionica o vakufima i vakifima, bosanskohercegovačkoj štampi 19. stoljeća (novinama, časopisima i kalendarima), arhitektonskom naslijeđu i sl. ■





Vijeće mladih općine Tomislavgrad

Ul. Letka b.b., 80240 Tomislavgrad
Tel.: +387 34 356 440; Fax: +387 34 356 444
E-mail: vijecemladih.tg@gmail.com
Web: www.vijecemladih-tg.com

Skupina mladih iz Tomislavgrada boravila je u studijskoj posjeti Banja Luci

Posjeta je organizirana kao dio projekta razmjene mladih radnog naziva: **"Affirmation of youth in the local community"**. Cilj projekta je jačanje kapaciteta mladih za aktivno sudjelovanje u lokalnoj zajednici i promicanje društvenog aktivizma mladih. Projekt je usmjeren na mlade sudionike s područja Tomislavgrada u Federaciji Bosne i Hercegovine i grada Banja Luke u Republici Srpskoj. Projekt podržava Veleposlanstvo SAD-a u Sarajevu.

Mladi aktivisti iz Banja Luke ugostili su mlade iz Tomislavgrada i bili domaćini

Kroz aktivnost projekta, dijalog između mladih i predstavnika lokalne vlasti, gosti iz Tomislavgrada nazočili su sastanku u zgradi Grada Banja Luke, gdje su ih dočekali predstavnici ove institucije. Kroz razgovor mladi su uputili pitanja predstavnicima lokalne zajednice o problemima i položaju mladih u Banjoj Luci. Ovo je bila idealna prilika da im se približe potrebe i problemi mladih u obje lokalne zajednice, te s prijedlogom da mladi ljudi aktivno sudjeluju u donošenju odluka na lokalnoj razini vezano uz mlade. U razgovoru je stavljen naglasak na uspostavu mehanizama propisanih "Zakonom o mladima FBiH" i "Zakonu o omladinskom organizovanju RS".



Ovom prigodom je na sastanku također bilo govora o uvjetima i načinima rada s mladima u Banjoj Luci i Tomislavgradu, mogućnostima i potencijalima buduće suradnje, razlikama i sličnostima u modalitetima rada sa mladima i njihovim potencijalima. Obje lokalne zajednice na različit način pokazuju zabrinutost za probleme mladih, mada su ukazali i na pozitivne pokazatelje u privrednim uspjesima i potencijalima koji bi trebali s vremenom biti razlozi zbog kojih bi mladi trebali imati perspektivu.

Pored sastanka s predstavnicima lokalne vlasti, održana je i radionica izrade angažiranog videa u prostoru Saveza nacionalnih manjina Republike Srpske.



Radionica izrade promotivnog videa bavila se izradom video uratka na temu aktivizma mladih u Tomislavgradu i Banja Luci. Sudionici su na ovoj radionici pripremili posljednju fazu izrade angažiranog videa, kratkog dokumentarnog filma. Tema video uratka je aktivizam mladih na području općine Tomislavgrad i Grada Banje Luke, s naglaskom na uspostavu mehanizama utvrđenih entitetskim Zakonima, Zakona o mladima FBiH i Zakonu o omladinskom organizovanju Republike Srpske. Temu su osmislili sami sudionici na edukativnim radionicama prilikom posjete mladih iz Banja Luke Tomislavgradu. Scenarij za kratki film su pripremili sami sudionici. Sudionici su biti angažirani kao pisci, novinari, snimatelji i urednici. Svatko je imao svoju ulogu u timu. Snimanje filma urađeno je na tvrđavi "Kastel" u središtu Banja Luke.



Više na našoj web starnici: www.vijecemladih-tg.com



Anesa Hidić, član Omladinske mreže, pojedinac

Omladinski krug Kladanj
E-mail: anesahidic@hotmail.com

Održan memorijalni malonogometni turnir "Hemed-Feho"

Programom obilježavanja manifestacije „**Dani općine Kladanj 2016.**“ osim kulturnih predviđena su i sportska dešavanja u okviru kojih je dana 7.5.2016. godine na školskom poligonu u Tarevu održan VIII tradicionalni memorijalni malonogometni turnir „*Hemed Feho*“, na kome je učešće uzelo 10 ekipa. Turnir je proglasio otvorenim načelnik općine Kladanj, *Jusuf Čavkunović*.

Svečani defile maturanata srednje škole „Musa Ćazim Ćatić“ Kladanj

Mladost Kladnja takođe je dala poseban pečat obilježavanju manifestacije "**Dani općine Kladanj 2016.**", svečanim defileom maturanata Srednje škole „*Musa Ćazim Ćatić*“ Kladanj. ■



Program povodom Dana općine u izvedbi učenika srednje škole

Svečani program povodom Dana općine Kladanj upriličili su učenici Mješovite srednje škole „Musa Ćazim Ćatić“, u okviru kojeg su prezentirali postignute rezultate sa kantonalnih i državnih takmičenja i izveli bogat kulturno-zabavni program.



Učenici osnovnih škola Kladanj i Stupari prezentovali školske aktivnosti

Dana 10.5.2016. godine je u okviru obilježavanja manifestacije "Dani općine Kladanj 2016." na platou ispred Doma kulture održan kulturno-zabavni program u organizaciji Osnovnih škola Kladanj i Stupari.

Ovom prilikom učenici su postavili i štandove na kojima su prezentovali školske sadržaje i aktivnosti, kao i uspjehe koje su postigli kroz rad u sekcijama.



Proslava male mature učenika Osnovne škole „Kladanj“

U utorak 24.05.2016. godine učenici završnih razreda osnovne škole „Kladanj“ iz Kladnja proslavili su malu maturu.



Konkurs za najbolji likovni rad

Dana 26.5.2016. godine je u prostorijama Medžlisa Kladanj izvršen odabir tri najuspješnija rada koji su pristigli povodom "Konkursa za najbolji likovni rad", a u povodu Dana džamija.

Komisiju su sačinjavali imami, *Džemal ef. Hatamleh*, *Enis ef. Hodžić* i *Almedin ef. Omerović*.

U proteklom periodu pristigao je veliki broj radova naše djece. Nakon pregleda komisija je jednoglasno donijela odluku, te su titulu najuspješnijih ponijeli:

1. mjesto: *Sabina Habibović*, učenica IV razreda OŠ. iz Crijevčića,
2. mjesto: *Lamija Buševac*, učenica V razreda OŠ. iz Kladnja,
3. mjesto: *Hodžić Hadis*, Tarevo.

Rezultati međunarodnog konkursa

Učenički časopis **OGLEDALO** iz Beograda raspisao je međunarodni konkurs kategorija: slika, fotografija, kratka priča, esej, pjesma. U konkurenciji 59 škola iz regiona naši sugrađani *Amina Mašić* i *Namir Mašić* učenici srednje škole „*Musa Ćazim Ćatić*“ Kladanj ušli su u najuži izbor najboljih 15 radova. Njihovi radovi bit će objavljeni u časopisu **OGLEDALO**.




H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Predsjednica "Merhameta" Dobož i medicinska sestra obišle stare i bolesne članove i uručile prigodne poklone. ■



Povodom 6. maja, svjetskog dana oboljenih od astme medicinsko osoblje "Merhamet" posjetilo je ovu populaciju. ■



Aktivisti "Merhameta" Doboj prisustvovali manifestaciji „Dan Evrope 2016. Doboj - grad mladih preduzetnika i stvaralaca“.



Predavanje o prevenciji zdravlja koju je održao *prof. dr. Zijad Bešliagić*.



Polaznici Mektebske nastave završili su ovu godinu veoma uspješno zahvaljujući uvaženom *Adil ef. Rudanoviću*, koji se maksimalno zalaže kako bi djeca naučila sve što je potrebno o svojoj vjeri. Predsjednica "Merhameta" Dobož podjelila prigodne paketiće nastavljeno druženje uz zakusku. ■



Povodom Dana porodice - 15. maja - 400 porodica dobilo humanitarnu pomoć. ■



Volonterke "Merhameta" Doboju *Semra Jašarević* i *Melisa Mujanović* učestvovala su na radionici u Topeeru povodom teme: „Pomirenje među mladima“.



Aktivisti "Merhameta" Doboju prisustvovali su "Promociji knjiga" koju je organizovala Bošnjačka zajednica kulture - Preporod.



Sastanak koalicija, tolerantno i pozitivno iz Doboja uz prisustvo aktivista "Merhameta".





Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

Privrednici iz FBiH i RS-a saglasni: Izmjene Zakona o PDV-u trebaju nam sad!

Institut za razvoj mladih KULT i u maju je intenzivno radio na zagovaranju izmjene Zakona o PDV-u. U okviru akcija potpisivanja pisma podrške procesu izmjene Zakona o porezu na dodanu vrijednost Bosne i Hercegovine, pismo podrške potpisalo je oko 30.000 privrednika okupljenih oko privrednih i obrtničkih komora, te udruženja koja u fokusu svog rada imaju pomoć privredi.

Pismo podrške prvenstveno je namijenjeno privrednicima, a među potpisnicima su predstavnici Privrednih i Obrtničkih komora iz Sarajeva, Banja Luke, Mostara, TK, SBK, USK, PK. Podršku inicijativi

pružili su i predstavnici Privrednih komora FBiH i RS, Udruženje poslodavaca FBiH, Udruženje Kupujmo i koristimo domaće, te Udruženje za unapređenje njemačko-bosanskohercegovačkih privrednih odnosa.

Izmjene Zakona o PDV-u neophodne su i prema izjavama *Mire Džakule*, direktora Uprave za indirektno oporezivanje BiH, koji je o ovoj problematici govorio na nedavno održanom „Ekonomskom forumu Jahorina 2016.“. Kako je istakao, PDV u BiH temeljen je na šestoj direktivi Vijeća Europe koja je stavljena van snage, a 112 direktiva je ključna za taj porez u EU, pa će tako naša zemlja, stoga što ide ka EU, morati kompletno promijeniti Zakon o porezu na dodanu vrijednost.

Institut za razvoj mladih KULT zalaže se za izmjene Zakona o porezu na dodanu vrijednost prema kojim bi poreski obveznici, oni koji ostvaruju godišnji promet do milion maraka, PDV plaćali nakon što naplate svoja potraživanja, a ne do 10. u mjesecu, kako to trenutni zakon nalaže. Izmjene bi se odnosile i na rješavanje pitanja prava na odbitak ulaznog PDV-a.

Prema trenutnim zakonskim propisima, poslodavci su dužni izmiriti porezne obaveze, iako nisu naplatili svoja potraživanja. To u konačnici čini brojne poslovne subjekte nelikvidnim, te često dovodi do prestanka poslovanja.

Pismo podrške dostupno je na web portalu: www.podrzi.poslovniprostorbh.org

Zagovaranje izmjene Zakona o PDV-u provodi se u okviru inicijative "**Poslovni prostor BH**", koju vodi Institut za razvoj mladih KULT. Inicijativa je dio Projekta održivosti civilnog društva u Bosni i Hercegovini (CSSP), koji provode Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).



Institut za razvoj mladih KULT podržao Javni poziv za odabir korisnika grant sredstava tekućih transfera FMRPO-a

Federalno ministarstvo razvoja, poduzetništva i obrta ove godine za pomoć i podršku privredi izdvojit će blizu 5 miliona maraka.

Na press konferenciji Federalnog ministarstva razvoja, poduzetništva i obrta i Instituta za razvoj mladih KULT, koja je 19.05.2016. godine održana u prostorijama *Networksa*, predstavljeni su načini prijave, kriteriji odabira korisnika, te oblasti u kojima će se sredstva dodjeljivati.

Javni poziv za odabir korisnika grant sredstava tekućih transfera FMRPO-a, kojeg ministarstvo redovno raspisuje na godišnjem nivou, objavljen je na web stranici ministarstva, a sredstva će se između ostalog dodjeljivati za poticaj poduzetništvu žena, poduzetništvu mladih, inovatorima.

Kako je istakao ministar razvoja, poduzetništva i obrta *Amir Zukić*, veoma je značajno da će kroz ovaj Javni poziv sredstva biti dodijeljena i budućim srednjoškolcima koji se planiraju školovati za deficitarna zanimanja.

Veliki je broj mladih osoba koje bi željele pokrenuti vlastiti posao, ali mnogi od njih nemaju novčana sredstva koja su im za to potrebna. Zato je ovaj Javni poziv veliki podsticaj mladima koji u ovoj zemlji nešto žele napraviti – istakao je *Jasmin Bešić*, izvršni direktor Instituta za razvoj mladih KULT.

Institut za razvoj mladih KULT pružit će ministarstvu tehničku, savjetodavnu i koordinacionu podršku u procesu informisanja mladih, žena, te osoba sa novoosnovanim biznisima, prvenstveno o načinima prijave na poziv.

Kako je kazala *Ajka Baručić*, voditeljica inicijative Poslovni prostor BH, koju realizuje Institut, mala i srednja preduzeća su ključni generatori radnih mjesta i toga bi svi trebali biti svjesni, posebno ako u obzir uzmemo činjenicu da je oko 500.000 nezaposlenih u BiH, a da sve više mladih napušta zemlju. Zato su ključ razvoja mladi koji osnivaju preduzeća.

Rok za prijave na Javni poziv je 17.06. 2016. godine, a javni poziv dostupan je na: www.fmrpo.gov.ba



Kanton Sarajevo će uskoro imati podatke o položaju mladih

Predstavnice Instituta za razvoj mladih KULT krajem maja održale su radni sastanak sa ministrom obrazovanja, nauke i mladih u Kantonu Sarajevo, gospodinom Elvirom Kazazovićem.

Tema sastanka bila je proces izrade Studije o položaju mladih, koja će predstavljati osnovu za izradu Strategije za mlade Kantona Sarajevo.

Dogovorena je metodologija izrade analize o potrebama i položaju mladih, te usuglašen upitnik koji će biti korišten kao jedan od alata u prikupljanju potrebnih podataka. Govorilo se i o važnosti učešća vijeća mladih u općinama i kantonima u donošenju bitnih odluka, a koje se tiču pitanja ove populacije.

Kako je zaključeno na sastanku, uskoro bi trebala biti formirana i radna grupa koja će na osnovu sačinjene analize započeti izradu Strategije prema mladima KS, a razmatrani su i načini na koje će se resorno ministarstvo dodatno uključiti u kreiranje što povoljnijeg ambijenta za mlade.

Institut za razvoj mladih KULT već intenzivno radi na pripremi Studije o položaju i potrebama i položaju mladih u KS.

Socijali dan u Institutu za razvoj mladih KULT

U prostorijama Instituta za razvoj mladih KULT i Obrazovno-raznodnog centra za mlade SPAJALICA, 25. maja 2016. godine, u okviru Socijalnog dana, boravilo je petnaest srednjoškolaca. Učenici su u Institutu proveli jedan „radni dan“ tokom kojeg su učili o radu u nevladinom sektoru, omladinskom aktivizmu, te načinima uključivanja u društveni i politički život zajednice.

Za mnoge učenike ovo je bilo i prvo volontersko iskustvo. „Ovo je moje prvo volontersko iskustvo i u narednom periodu ću se potruditi da se uključim u druge volonterske akcije. Provesti jedan dan na ovakav način je ogromno iskustvo, a što je najbitnije shvatila sam koliko je bitno društveno se angažovati“ – poručila je svojim vršnjacima Ilvana Podgorica, učenica Srednje škole za okoliš i drveni dizajn.

Socijalni dan organizovan je u sklopu projekta „Volontiraj - kreditiraj“, a zamisao je da učenici jedan dan nastave mijenjaju jednim danom volonterskog rada u firmama i nevladinim organizacijama. Za rad im se uplaćuje dnevica koja je namijenjena isključivo za potrebe njihovih projekata.

Projekat „Volontiraj – kreditiraj“ realizuje Udruženje „Infohouse“, a glavni cilj je jačanje kapaciteta mladih kako bi bili u mogućnosti da preuzmu odgovornost za svoju profesionalnu budućnost, razvoj lokalne zajednice ali i poboljšanja statusa mladih u cjelini. ■



Volonteri iz osam zemalja na druženju u Spajalici

Obrazovno-raznodni centar za mlade SPAJALICA na Ilidži u maju je ugostio volontere iz osam zemalja.

Organizovana je „Kafa sa... volonterima Europske volonterske službe“ gdje su mladi razmijenili iskustva. Druženju su prisustvovali volonteri Europske volonterske službe i Obrazovno-raznodnog centra za mlade Spajalica, te predstavnici Udruženja za prevenciju ovisnosti "Narko-ne".

Razgovarali su o načinima života mladih u Bosni i Hercegovini, obrazovnom sistemu, te prednostima koje mladima pruža volontiranje.

Volonteri Europske volonterske službe upoznali su se sa radom Instituta za razvoj mladih KULT i Obrazovno-raznodnog centra Spajalica, te pokušali savladati osnove lokalnog jezika.

Europska volonterska služba/servis (EVS) omogućava mladima da u nekoj drugoj državi obavljaju volontersku službu iz područja svog interesa. Volontirati se može u područjima kao što su kultura, mladi, sport, djeca, kulturna baština, umjetnost, dobrobit životinja, okoliš i slično.

Volonteri iz **Austrije, Danske, Turske, Francuske, Njemačke, Češke, Italije i Velike Britanije** u zemljama zapadnog Balkana u okviru programa borave minimalno tri mjeseca, a najviše godinu dana, gdje se druže s mladima, pomažu u rješavanju lokalnih problema, te stiču nova znanja koja će primjenjivati u budućim volonterskim angažmanima. ■



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH
Tel./Fax: +387 49 211 032
Email: svitac@gmail.net
Web: www.svitac.org
FB: www.facebook.com/omladinska.svitac

Dnevne radionice

Omladinska organizacija Svitac je u maju nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima je ovog mjeseca pravila crteže sa bubamarama, visibabe i druge vrste cvijeća od ukrasnih trakica, šarene papirne ptice koristeći vodene, drvene i akrilne boje, kao i vatu, ljepilo, karton, mekanu žicu i kolaž papir. Jutarnja mala grupa je svakog četvrtka učila i ponavljala brojeve od 1-10 koristeći radne listove za bojenje, a ponavljali su i oblike i boje na engleskom jeziku. Cilj ovih aktivnosti je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugima i usvoje lijepo ponašanje. U maju je između 20-27 učesnika svaki dan pohađalo jutarnje kreativne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti (uzrast 8+).



Ponedjeljom je na rasporedu engleski jezik, komunikacija, izgovor, te razne igre koje pospješuju učenje stranog jezika u grupi. Grupa je takođe i ovaj mjesec rješavala gramatičke zadatke i vježbala rečenice u Pasivu. Utorkom je kreativno izražavanje - pravljenje raznih dekoracija i cvijeća od krep papira i mekane žice. Srijedom je muzička radionica gdje učesnici imaju priliku da nauče osnove teorije muzike i notni sistem te da razvijaju sposobnosti komunikacije i dijaloga na temu „ritam“. Svakog četvrtka grupa je podijeljena u dvije manje i učesnici imaju mogućnost da izaberu sport ili dramu.

Petak je dan za učenje osnova njemačkog jezika kao i za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u maju je bila *Slađana Bašić* uz asistenciju lokalnih i Weltwaerts i EVS međunarodnih volontera *Jonasa Kiesnera*, *Anne Bonitz* i *Johanne Weng* iz Njemačke, *Vanesse Brumen* i *Therese Bittman* iz Austrije, *Alee Whiteman* iz Australije, *Samanthe Peterson* iz SAD-a, te *Monice Reeves* iz Velike Britanije. Broj učesnika starije grupe je trenutno između 20 i 25 učesnika. ■

Jezičke radionice

Kursevi engleskog i njemačkog jezika su nastavljani i u maju. 35 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskog centra Brčko distrikta. Starost studenata je od 8 do 35 godina. ■



„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-20:00 časova. Zbog velike zainteresovanosti i različitih nivoa poznavanja jezika i gramatike, učesnici su podijeljeni u dvije grupe, naime u grupu za početnike (novi A1) i napredne (A2, B1, B2). Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta su međunarodne volonterke iz Njemačke *Anne Bonitz* i *Johanna Weng*. Radionice je u maju pohađalo 25 učesnika (obje grupe). ■

„I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta je međunarodna volonterka iz Velike Britanije *Monica Reeves*. Radionice u maju je pohađalo 10 učesnika. ■

„Parliamo italiano insieme“ – radionice komunikacije na italijanskom jeziku za početnike

Radionice italijanskog jezika se održavaju svakog utorka u prostorijama Omladinskog centra Brčko distrikt od 18:00-19:30 časova. Radionice komunikacije na italijanskom jeziku su namijenjene za uzrast 16+ za sve koji žele naučiti osnove italijanskog jezika i upotrebu svakodnevne komunikacije u dijalozima, te steći nova iskustva i poznanstva. Koordinator projekta je međunarodna volonterka iz Austrije *Vanessa Brumen*. Radionice je u maju pohađalo 10 učesnika. ■

Radionice komunikacije na francuskom jeziku za početnike

Radionice francuskog jezika se održavaju svakog petka u prostorijama Omladinskog centra Brčko distrikt od 18:30-20:00 časova. Radionice na francuskom jeziku su namijenjene za uzrast 16+ za sve koji žele naučiti osnove francuskog jezika te steći nova iskustva i poznanstva. Fokus je na vježbama i dijalozima svakodnevne komunikacije. Koordinator projekta je međunarodna volonterka iz Njemačke *Anne Bonitz*. Radionice u maju je pohađalo 9 učesnika. ■

Dramske radionice

Projekat „Dramske radionice“ za mlade se održava svakog utorka u prostorijama Omladinskog centra Brčko distrikt od 19:30-21:00 časova. Grupa trenutno radi na petoj sceni komedije „**Ne mora uvijek biti Šekspir**“. Vježbe zagrijavanja u trajanju od 10 do 20 minuta su od velike pomoći za opuštanje prije aktuelne realizacije radionice. Cilj ovog projekta je da mladi ljudi, koji vole pozorište i glumu usvoje nove vještine, te da steknu nova iskustva i poznanstva. Koordinator projekta je *Anne Bonitz*, međunarodna volonterka iz Njemačke. Dramske radionice u maju je pohađalo 10 učesnika, uzrasta 16+. ■

„Freeletics“ – sportske radionice

Sportske radionice „Freeletics“ se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt. Radionice su namijenjene za mlade ljude koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator projekta je *Miloš Popić*. Radionice u maju je pohađalo 9 učesnika. ■

Muzičke radionice

U prvoj polovini maja EVS volonterka *Monica Reeves* je uz pomoć lokalnih volontera nastavila sa nizom muzičkih radionica različitog sadržaja. ■

Radionice gitare

Učesnici radionice gitare u maju su nastavili sa redovnim radom i pohađanjem radionica. ■



Radionice sambe

Učesnici ove radionice u maju su većinom radili na improvizaciji i kroz improvizaciju na kreiranju kraćih ritmičkih cjelina (svako na svom instrumentu), koje bi se kasnije uklopile u veću cjelinu. Ova praksa će se nastaviti u narednom periodu, tako da će jedan dio radionice biti posvećen sviranju poznatih kompozicija a drugi improvizaciji i komponovanju novih. ■



FUTURESHORTS FILM FESTIVAL

U petak, 27-og maja, u 20:00 časova Omladinska organizacija Svitac pripremila je još jedno veče kratkog filma u Brčkom. Projekcija filmova u Brčkom dio je globalnog **FutureShorts film festivala**. Program ovogodišnje proljetne sezone prikazivan je u 100 gradova i 40 zemalja širom svijeta.



U program je bilo uvršteno 7 kratkometražnih filmova:

- **Home Suite Home**, Nizozemska. Režija: Jeroen Houben
- **Leidi, Kolumbija**, VelikaBritanija. Režija: Simon Mesa Soto
- **Sunday Lunch**, Francuska. Režija: Celine Deavux
- **Perfection is Forever**, SAD. Režija: Marta Trifu
- **RATIONALE/ FAST LANE**, SAD. Režija: Luke Monaghan
- **A HOLE IN MY HEART**, Nizozemska, Francuska. Režija: MeesPeijnenburg
- **EDMOND**, SAD. Režija: Nina Gantz

Nakon projekcije u Omladinskom centru u Brčkom publika je glasala za film koji joj se najviše dopao. Najviše glasova dobio je film „**Home Suite Home**“, režisera Jeroen Houbena.



Za juni se planira nastavak svih redovnih radionica Omladinske organizacije Svitac.

SAOPŠTENJA/INFORMACIJE/ DONATORI/POZIVI

Grantovi za izvještavanje o ženskim pričama

IWMF grantovi za izvještavanje o ženskim pričama (**The IWMF's Reporting Grants for Women's Stories**), finansirani od strane organizacije Sekularno društvo (**The Secular Society**), je nova inicijativa koja podržava novinarstvo proizvedeno od strane žena, i o ženama. Potreba za raznovrsnim pokrivanjem rodničkih tema je najvažnija za slobodno i reprezentativno novinarstvo u doba povećane globalizacije. Ti grantovi će biti katalizator za izvještavanje o neispričanim pričama o problemima koji utiču na žene i djevojke kao i njihov svakodnevni život.

Kroz programe, stipendije i grantove IWMF osnažuje novinarke putem edukacija, podrške i umrežavanjem, kako bi postale liderice u industriji izvještavanja. IWMF prepoznaje da je promocija rada i unapređenje uloge žena u medijima ključno za transparentnost, te da su novinarke i dalje nedovoljno zastupljene u medijskim organizacijama širom svijeta. Prema tome, priče o ženama i temama koje utiču na njihove živote su i dalje jako slabo praćene. IWMF-ovi grantovi za izvještavanje o pričama žena je inicijativa koja omogućava novinarkama pristup neispričanim pričama kroz nove načine finansiranja kojim se naglašava rodno uravnoteženo izvještavanje.

Sekularno društvo (**The Secular Society**) podržava jednakost spolova kroz donacije nezavisnom izvještavanju, koje ukazuje na potrebu da novinarke dobiju snažnije mogućnosti finansiranja kako bi nastavile sa novinarstvom u javnom interesu. Sekularno društvo vjeruje da vladine i vjerske organizacije trebaju biti odvojene; također drži da su sva vjerska uvjerenja jednako vrijedna i prema njima se treba odnositi sa tolerancijom i poštovanjem. Novinarstvo finansirano od strane IWMF-ovih grantova za izvještavanje o pričama žena će doprinijeti većem razgovoru o globalnoj ulozi sekularizma i usredotočiće se na izazove sa kojima se susreću žene u nesvjetovnom svijetu.

Grantovi pružaju mogućnosti za novinarke da prate važne međunarodne priče kroz rodno osjetljivu pokrivenost prijavljenih tema. Prosječna vrijednost granta je 5.000 dolara.

Grantovi će se dodjeljivati za pokrivanje troškova izvještavanja, uključujući troškove putovanja (letove, transport u zemlji, vozače), logistiku, vize, te plaćanje za prevoditelja/icu kao i osoba koje pomažu u ugovaranju sastanaka.

Sve aplikacije je potrebno predati putem IWMF-og online sistema apliciranja.

Aplikacije za grantove se stalno razmatraju. Sredstva će se dodjeljivati i dobitnice će biti informisane tri puta godišnje: u aprilu, avgustu i decembru. Kandidatkinje se istovremeno mogu prijaviti za Grantove izvještavanja o ženskim pričama i Howard G. Buffett fond za ženske novinare.

Prijedlozi projekata koji su posebno osjetljivi na vremenske rokove će biti razmatrani od slučaja do slučaja. Ako je vaš prijedlog projekta osjetljiv na vremenske rokove budite spremni objasniti zašto je to tako u svojoj prijavi.

Više informacija i apliciranje na linku: <https://iwmf.submittable.com/submit/58104>

Smart Start poziv za projekte

Smart Start je regionalni projekt finansiran od strane EU – Ustanove Civilnog društva (**Civil Society Facility**) i Program Media 2014-2015 (Podrška regionalnim tematskim mrežama organizacija civilnog društva).

Ovaj projekt se realizuje u zemljama korisnicima IPA-e na zapadnom Balkanu i Turskoj, a implementira ga projektni konzorcij: Centar za promociju civilnog društva – CCSP (**Bosna i Hercegovina**), Centar za istraživanje i kreiranje politika (**Makedonija**), Institut za poduzetništvo i ekonomski razvoj (**Crna Gora**), Centar za razvoj neprofitnog sektora (**Srbija**) i YADA Foundation (**Turska**), uz podršku partnerske organizacije CEDRA HR iz **Hrvatske**.

Opšti cilj Smart Start-a je da pomogne u stvaranju povoljnog okruženja za društveno poduzetništvo organizacija civilnog društva (OCD) i da poboljšaju svoje opštu i finansijsku održivost, te društveni uticaj u Bosni i Hercegovini, Makedoniji, Crnoj Gori, Srbiji i Turskoj.

U okviru specifičnog cilja koji se odnosi na jačanje dugoročne finansijske održivosti i uticaja, 50 odabranih OCD-a u pet zemalja partnera će imati start-up finansijsku podršku i društveno i ekološki odgovorno korištenje samofinansirajućih strategija, socijalnih inovacija i socijalnog preduzeća. Smart Start projekt poziva organizacije civilnog društva da se prijave za pomoć u razvoju aktivnosti socijalnog biznisa / stvaranja prihoda.

Prva faza: Smart Start će izabrati 100 organizacija civilnog društva u 5 zemalja (20 po zemlji) koje će dobiti prilagođenu podršku za izgradnju kapaciteta za podršku u cilju razvoja vještina potrebnih za razvoj socijalnog poduzetništva OCD-a. Tokom prilagođene edukacije će biti razvijeni biznis planovi, a edukacija će biti zasnovana na idejama razvijenim od strane OCD-a.

Druga faza: Izbor organizacija korisnica grantova će biti zasnovan na biznis planovima koje će podnijeti 100 organizacija – učesnica programa izgradnje kapaciteta odabranih u prvoj fazi. Finansijska podrška će se koristiti kao start-up fond za odabrane organizacije, i biće finansirani odgovarajući troškovi potrebni za kupovinu neophodne opreme, usluga, edukaciju osoblja, materijala i slično.

Odabrane organizacije će dobiti finansijsku podršku u iznosu od maksimalno 6.170 eura. Traženi doprinos organizacije je minimalno 10% (podrška Smart Start projekta u iznosu od EUR 5.553 i doprinos organizacija civilnog društva u iznosu od 617 eura).

Kvalificiranost

Da bi bili podobni za podršku Smart Start-a, aplikanti moraju:

1. **Biti neprofitne organizacije**, registrovani kao udruženje građana ili neki drugi sličan oblik organizacije civilnog društva (fondacije nisu kvalificirane);
2. **Biti lokalna organizacija** registrovana u jednoj od sljedećih zemalja: Bosna i Hercegovina, Makedonija, Crna Gora, Srbija i Turska;
3. **Imati ideju** kako započeti sa prodajom proizvoda i/ili usluge u cilju jačanja svoje održivosti i osigurati kontinuiranu podršku korisnicima ili je organizacija već počela aktivnosti za stvaranje prihoda u OCD-u (uključujući i osnivanje posebnog pravnog tijela u vlasništvu organizacije).

Predaja aplikacije

Jezik pisanja aplikacije je lokalni jezik.

Rok predaje aplikacije je 13. juni/lipanj.

Više informacija na: http://www.civilnodrustvo.ba/files/Call_for_Applications_SmartStart_10.5.2016..pdf

Otvoren konkurs za kulturne programe nacionalnih manjina u Republici Srpskoj

Ministarstvo prosvjete i kulture Republike Srpske objavilo je Javni konkurs za sufinansiranje kulturnog stvaralaštva nacionalnih manjina u Republici Srpskoj za 2016. godinu, za šta je budžetom planirano **30.000 maraka**.

Javni konkurs se raspisuje za projekte koji afirmišu kulturu i kulturnu raznolikost putem očuvanja, zaštite i prezentacije kulturnog naslijeđa nacionalnih manjina, te istraživačke, edukativne i projekte koji su namijenjeni djeci i mladima, a radi očuvanja kulture nacionalnih manjina.

Pravo podnošenja prijave na Javni konkurs imaju udruženja nacionalnih manjina registrovana na lokalnom nivou u Republici Srpskoj i udruženja nacionalnih manjina od posebnog značaja za Republiku Srpsku.

Javni konkurs za sufinansiranje projekata kulturnog stvaralaštva nacionalnih manjina u Republici Srpskoj za 2016. godinu dostupan je na portalu Vlade Republike Srpske – na stranici Ministarstva prosvjete i kulture.

Konkurs je otvoren 30 dana od dana objavljivanja.

Izvor: <http://www.vladars.net/sr-SP-Cyrl/Vlada/Ministarstva/mpk/JavniPozivi/javnipozivi/Pages/javni-konkurs-za-sufinansiranje-projekata-kulturnog-stvar.-nacionalnih-manjina-2016.aspx>

Fondacija "Izvor nade": Konkurs za dodjelu srednjoškolskih stipendija

Rok prijave 30.06.2016

1. Upravni odbor Fondacije "Izvor nade" Sarajevo donosi Odluku o dodjeli 60 stipendija učenicima završnih razreda osnovnih škola te učenicima srednjih škola sa teritorije Bosne i Hercegovine u školskoj 2016/17. godini i to:

- 30 stipendija za učenike završnih razreda osnovnih škola i za sve učenike srednjih škola;
- 30 stipendija za učenike generacije (ponos generacije) i super odlične učenike završnih razreda osnovnih škola.

2. Stipendije se dodjeljuju za školsku 2016/17. godinu, počevši od 1. septembra 2016. do 30. juna 2017. godine.

Stipendije se realiziraju na način da se srednjoškolicima subvencioniraju troškovi smještaja i ishrane tokom školske 2016/17. godine (septembar – juni).

3. Način stipendiranja i iznosi stipendija

- Fondacija u potpunosti subvencionira troškove smještaja i ishrane za učenike generacije (ponos generacije) te za super odlične učenike završnih razreda osnovnih škola, u iznosu od 250,00 KM;
- Fondacija subvencionira troškove smještaja i ishrane za učenike završnih razreda osnovnih škola te za učenike srednjih škola koji nisu iz prethodne kategorije, u iznosu od 200,00 KM.

4. Opći kriteriji i uvjeti koji prethode dodjeli stipendija učenicima završnih razreda osnovnih škola i svim učenicima srednjih škola su:

- uspjeh tokom osnovnoškolskog obrazovanja (prosjeck ocjena i vannastavne aktivnosti);
- mjesečna primanja porodice kandidata;
- razgovor koji se obavlja s roditeljem/starateljem kandidata u prostorijama Fondacije.

5. Način prijave na konkurs:

- pravo prijave na Konkurs imaju svi učenici završnih razreda osnovnih škola i svi učenici srednjih škola;
- prijave se vrše putem online aplikacije izvornade.com/aplikacija za učenike.

Sve dodatne informacije u vezi s načinom prijave na Konkurs dostupne su putem e-mail adrese stipendija@izvornade.com.

Izvor: <http://www.hocu.ba/index.php/hocu.priliku/fondacija-izvor-nade-konkurs-za-dodjelu-srednjoskolskih-stipendija/>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla**

*Mjesečni bilten uređuje
Omladinski resursni centar -
ORC Tuzla*

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*